



Atassut  
Siverth K. Heilmann

5. oktober 2021  
UKA 2021/134

## **Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Naalakkersut Atuarfik pillugu Inatsisartut inatsisaata allanngortinneqarnissaanut atasumik saqqummiussaqaqarnerannut qujanaq, imatullu naatsumik Atassummiit oqaseqarfigissavarput.

Ilinniartitaanermi aqqissuussineq ingerlaavartumik pitsanngorsaaqqinnissaq imarisamigut annertuumik imaqaqarmat, annerusumik itisiliinngikkaluarluta aamma meeqqat atuarfianni pitsaassusissanik annertunerulersitsinisarnissamik tunngaveqarneq siunertaqaqarnerlu Atassummiit siunnersuut saqqummiunneqartoq tunngaviatigut isumaqatigilluinnarlugu oqaatigissavarput.

Taamatutaaq inatsimmi pioreersumut nutarteriniarneqarneri, tusarniaanermilu akissutaasut siusinnerusukkullu oqallittarnerni qaqqinneqartarsimasat naleqqussarfigineqarluarsimasutut Atassummiit pitsaasutut isumaqatigalugillu nalilerpagut.

Ukiorpaaluit matuma siornali qarasaasiarsornermut pulareernikuuvugut, qangatullu pisariusumut utersaaqqinnissarput tamatsinnut kajungernartuunavianngitsoq isumaqatigiissutigisinnaagipput naatsorsuutigaaara. Ilami qarasaasiaq (digitali) atorlugu nunani allani misilittakkat atorlugit, Nunatsinni nunaqafinni illoqarfinnilu nakorsaqaqarfiunngitsuni nakorsiarsinnaanermut teknikkut periarfissat apeqqutaaginnarlutik siuariartorput.

Taamatutaaq meeqqat atuarfiini illoqarfinni nunaqarfinnilumi atugaanera siuariartorpoq. Nunaqarfinnguami Napasoq-imi meeqqat atuartut, nunarsuatta ilaanniit tuluttut ilinniartinneqartarnerat Qeqqata Kommuune-ani pitsaasumik misilittagaqarfigaarput. Nunani allaneersunut suleqateqarsinnaaneq naleqqussarsinnaanerlu eqqumaffigigaanni aqutissiuullugulu pitsaasumik angusaqartoqarsinnaavoq.

Taamatut Atassummiit oqaseqarluta inassutigissavarput, suliap aappassaaneernejartigani ataatsimiititaliami susassaqaqartumut ingerlateqqaarneqassasoq.

Qujanaq.